

**ACTA DA SESIÓN EXTRAORDINARIA CELEBRADA POLO CONCELLO PLENO EN
DATA 20 DE XUÑO DE 2008.-**

Presidente:

Sr. Alcalde-Presidente
D. José Iván Puentes Rivera.

Asistentes:

D. Antón Lois Noceda Carballo (se incorpora á sesión no momento que se expresa na presente acta).
D^a M^a Carmen Silvar Canosa.
D. Manuel López Rodríguez.
D^a Amalia García Balado. D. Manuel Angel Rodríguez Carballeira
D. José Antonio López Rodríguez.
D^a Rita María Couto Seijido
D^a Inés Roca Requeijo.
D. Manuel Vicente Pico Sanmartín
D. Manuel Polo Gundín.
D. Edgar Antonio Vigo López
D. Gumersindo Pedro Galego Feal.
D^a Rocio Aurora Bértoa Puente.
D. Juan José Franco Casal.
D^a M^a Pilar Fornos Corral
D. Manuel Sánchez Martínez.

Interventora:

D^a Marta Roca Naveira.

Secretaria:

D^a Pilar María Pastor Novo.

No salón de sesións da Casa Consistorial do Concello de Fene (A Coruña), sendo as nove horas e doce minutos do día vinte de xuño de dous mil oito, reúnese, en primeira convocatoria, o Pleno do Concello ao obxecto de celebrar sesión extraordinaria, baixo a Presidencia do Sr. Alcalde-Presidente D. José Iván Puentes Rivera, e coa asistencia dos/as Sres/as Concelleiros/as Don Antón Lois Noceda Carballo, (quen se incorpora á sesión no momento que se expresa na presente acta), D^a M^a Carmen Silvar Canosa, Don Manuel López Rodríguez, D^a Amalia García Balado, Don Manuel Angel Rodríguez Carballeira, Don José Antonio López Rodríguez, D^a Rita María Couto Seijido, D^a Inés Roca Requeijo, Don Manuel Vicente Pico Sanmartín, Don Manuel Polo Gundín, Don Edgar Antonio Vigo López, Don Gumersindo Pedro Galego Feal, D^a Rocio Aurora Bértoa Puente, Don Juan José Franco Casal, Dona M^a Pilar Fornos Corral e Don Manuel Sánchez Martínez.

Asiste á sesión a Interventora municipal D^a Marta Roca Naveira, e actúa como Secretaria D^a Pilar María Pastor Novo, Secretaria Xeral do Concello, que da fe do acto.

A Presidencia, tras comprobar nos termos expostos que se da o quórum legalmente esixido polo artigo 90.1 do Real Decreto 2568/1986, de 28 de novembro, declara aberta a sesión, pasándose ao estudo e exame dos asuntos incluídos na orde do día da convocatoria.

PUNTO ÚNICO: Previa ratificación da súa inclusión na Orde do Día, adhesión ao novo grupo de desenvolvemento rural Asociación Costa Noroeste.

A continuación intervéñ o Sr. Alcalde-Presidente e manifesta que a celebración deste pleno extraordinario ven motivada polo remate do prazo concedido para que os Concellos se adhiran a este grupo de acción local que é a Costa Noroeste, e dado que o pleno convocouse antes de que a Comisión informativa ditaminase o asunto con carácter previo debe procederse a someter a votación a ratificación da súa inclusión na orde do día, a pesar de que a día de hoxe xa está ditaminado pola Comisión Informativa.

De seguido pola Presidencia sométese a votación ordinaria a ratificación da inclusión na orde do día do asunto sendo aprobada por unanimidade dos/as Sres/as Concelleiros/as presentes.

Á vista do resultado da votación declárase aprobada a ratificación da inclusión do asunto na orde do día.

De seguido dáse conta do ditame da Comisión Informativa de Facenda e Promoción Económica de data 19 de xuño de 2008 que transcrito di:

“ 2.- ADHESIÓN O NOVO GRUPO DE DESENVOLVEMENTO RURAL ASOCIACION COSTA NOROESTE.-

Seguidamente dáse conta da proposición da alcaldía de data 17 de xuño de 2008, que, transcrita dí:

“Visto o escrito remitido por Costa Artabra (entrada 19.05.08, núm rexistro 5205) no que expon que no marco do novo Programa de Desenvolvemento Rural de Galicia 2007-2013, e en concreto, do futuro programa LEADER, tra-las charlas informativas, reunións sectoriais e delimitación pola Xunta de Galicia dos territorios para este novo período, ven de crearse unha Comisión Xestora, có obxectivo de avanzar na configuración do novo grupo e na elaboración do programa e que a Xestora encárgase de contactar cós Concellos e Entidades que xa son socios de Costa Ártabra ou ben manifestaron o seu interese en formar parte de Costa Noroeste, así como que para adherirse á Asociación Costa Noroeste, é necesario que se adopten, polo órgano competente o acordo nese sentido así como o de aprobación dos Estatutos.

PROPÓNSE AO PLENO DA CORPORACIÓN A ADOPCIÓN DO SEGUINTE ACORDO:

Primeiro.- Formar parte este Concello dunha Asociación en trámites de constitución que se demoninará “Asociación Costa Noroeste”.

Segundo.- Aprobar o borrador de Estatutos da futura Asociación que se transcriben como Anexo, formando parte do presente acordo.

Terceiro.- Designar como representante do Concello de Fene no acto constitutivo da nova asociación a Don Manuel Polo Gundin con D.N.I. núm 32668642-V, concelleiro deste Concello.

Cuarto.- Remitir certificación do presente acordo á Asociación Costa Artabra.

ANEXO

ESTATUTOS DA ASOCIACIÓN COSTA NOROESTE

TÍTULO I. DENOMINACIÓN E RÉXIME LEGAL

Artigo 1. Denominación

Constitúese a Asociación “Costa Noroeste”

A asociación carece de ánimo de lucro.

Os beneficios que obteña por calquera concepto destinaranse exclusivamente ao cumprimento dos fins da asociación, sen que se poidan repartir entre os asociados nin outras persoas físicas ou xurídicas con fin lucrativo.

Artigo 2. Réxime legal

A asociación rexerese polo artigo 22 da Constitución, pola Lei Orgánica 1/2002, do 22 de marzo, reguladora do dereito de asociación, polo Real Decreto 1497/2003, do 28 de novembro, polo que se aproba o regulamento do

registro nacional de asociacións e das súas relacións cos restantes registros de asociacións, por estes estatutos e polo regulamento de réxime interno que, de ser o caso, se aprobe, así como polos acordos validamente adoptados na asemblea xeral e órganos directivos dentro da esfera da súa respectiva competencia.

TÍTULO II. DOMICILIO SOCIAL E ÁMBITO DE ACTUACIÓN

Artigo 3. Domicilio

A asociación fixa o domicilio social en A Malata, s/n. Edif. de Usos Múltiples, baixo, C.P. 15405, no concello de Ferrol. A Asociación contará, asimismo, con outra oficina ubicada no concello de Ortigueira, co obxecto de facilitar as xestións e achegamento á poboación, así como posibilitar a dinamización en todo o territorio no que se actúa.

Artigo 4. Ámbito de actuación

A asociación terá como ámbito de actuación preferente o dos concellos de Ares, Cariño, Cedeira, Cerdido, Fene, Ferrol, Mañón, Mugaros, Narón, Neda, Ortigueira e Valdoviño, na provincia de A Coruña, sen prexuízo de que poida estenderse por necesidades operativas dos seus programas e actividades.

TÍTULO III. FINS E ACTIVIDADES

Artigo 5. Fins e actividades

1.- A asociación constitúese coa finalidade de ser o núcleo de integración e representación dos diferentes axentes territoriais, institucionais, sociais e económicos, tanto públicos como privados, interesados en promover o desenvolvemento do territorio de actuación, para acadar os seguintes fins:

- a) Vertebrar os diferentes sectores socioeconómicos e constituír un foro de debate continuo sobre os problemas da zona, prestando especial atención aos mozos, ás mulleres, á protección do ambiente e á creación de emprego.
- b) Sensibilizar as administracións locais, autonómica e estatal, así como as institucións comunitarias europeas, canalizando as demandas da poboación do territorio, co obxecto de optimizar o aproveitamento dos recursos endóxenos da zona de cara ao seu desenvolvemento harmónico e integral.
- c) Ser centro receptor e distribuidor de toda a información relativa ao desenvolvemento socioeconómico do medio rural, tanto a nivel nacional coma internacional, centrándose esta labor principalmente no coñecemento dos recursos e promoción de proxectos e iniciativas de interese para lograr un desenvolvemento harmónico, equilibrado, endógeno, sostible e integral.
- d) Posibilitar entre os asociados e outros interesados o intercambio de experiencias e metodoloxías de animación e desenvolvemento socioeconómico.
- e) Potenciar, revalorizar e preservar os recursos naturais, culturais, históricos e artísticos da zona.
- f) Concienciar á poboación da necesidade de protexer o ambiente e o contorno rural, e tomar parte activa niso, mediante actividades orixinais e innovadoras.
- g) Formular e transmitir á poboación a estratexia adecuada para lograr o desenvolvemento da zona, así como promover a súa aplicación.
- h) Articular unha dinámica de participación que facilite o desenvolvemento tanto social como económico.

2.- Para acadar os ditos fins, a asociación poderá desenvolver as seguintes actividades:

- a) Desenvolver iniciativas dirixidas a frear o éxodo rural, así como a fomentar a creación de emprego.
- b) Sensibilizar o tecido socioeconómico da zona sobre os problemas, recursos, accións e proxectos que contribúan ao seu desenvolvemento.
- c) Organizar, promover, coordinar e realizar todo tipo de actividades socioculturais, tales como seminarios, conferencias, xornadas, investigacións e estudos relativos aos problemas de desenvolvemento da zona, así como editar, no seu caso, todo tipo de material en soporte escrito, audiovisual ou informático, de carácter especializado, didáctico ou, simplemente, divulgativo.
- d) Solicitar ante calquera instancia e executar, no seu caso, a realización de calquera actividade, programa ou proxecto relacionado cos obxectivos da asociación.
- e) Proxectar, preparar e executar cantas accións ou actividades sexan necesarias para acadar unha axeitada formación e posta ao día permanente de todos os colectivos vinculados ao desenvolvemento rural, especialmente dos membros da asociación.
- f) Promover o intercambio de experiencias e metodoloxías de traballo, así como a busca de liñas de actuación conxunta con entidades análogas, nacionais ou internacionais.
- g) Levar a cabo as campañas de difusión e publicidade que se estimen necesarias.
- h) Recoller, tratar, difundir e intercambiar documentación e información relativa ao desenvolvemento rural a través dos medios adecuados.
- i) Implicarse na xestión de programas de desenvolvemento do seu territorio.
- j) Promover directamente actuacións e proxectos que incidan no desenvolvemento do territorio de actuación.
- k) Calquera outra actividade que poida resultar necesaria ou consecuenta coas anteriores.

TÍTULO IV. ASOCIADOS

Artigo 6. Composición

1.- A asociación "Costa Noroeste" estará integrada por un conxunto equilibrado e representativo dos interlocutores dos diferentes sectores socioeconómicos, tanto públicos como privados, con arraigo no ámbito de actuación da asociación, debendo ter tamén un carácter equilibrado e representativo no plano territorial. Non poderán formar parte da asociación as persoas físicas e as sociedades mercantís, excepto as seguintes entidades de economía social: cooperativas, sociedades agrarias de transformación e sociedades laborais. Rexerá o principio de portas abertas, de xeito que se garanta permanentemente a incorporación de asociados.

2.- A efectos de adopción de decisións, o sector privado, constituído polos axentes económicos e sociais así como por outros representantes da sociedade civil, deberá representar máis do 50% dos votos en todos os órganos de decisión.

Artigo 7. Adquisición da condición de asociado

1.- Para que unha entidade teña a condición de asociado deberá figurar na lista de fundadores ou ben, unha vez constituída a asociación, solicitar o ingreso mediante un escrito dirixido ao presidente no que manifeste a vontade expresa de adherirse á asociación e de comprometerse coa consecución dos fins estatutarios. Debe xuntar, ademais, un acordo do órgano competente da entidade que exprese a vontade de ser asociado e a persoa que a representará na asociación.

2.- Cando un candidato a ser asociado non teña o seu domicilio social no ámbito de actuación desta asociación deberá demostrar que desenvolve unha actividade relevante e consolidada no tempo en dito ámbito territorial.

3.- Cando unha entidade solicite a entrada na asociación, unha vez constituída esta, deberá acreditar un ano de actividade no ámbito territorial da asociación.

4.- O presidente trasladará a solicitude á xunta directiva, que deberá resolver nun prazo non superior a dous meses dende a data de presentación, adscribindo a solicitante a unha das mesas sectoriais, segundo o seu interese preferente. Contra o acordo denegatorio da admisión o solicitante poderá recorrer ante a primeira asemblea xeral que teña lugar, debendo figurar este asunto expresamente na orde do día correspondente.

Artigo 8. Perda da condición de asociado

A baixa da asociación por calquera motivo non exime ao asociado de satisfacer as obrigas e compromisos de calquera natureza que tivera pendentes.

Perderase a condición de asociado:

- a) Por decisión voluntaria do asociado, comunicada por escrito ao presidente.
- b) Por sanción imposta pola xunta directiva, de xeito motivado e con audiencia do interesado, por incumprimento grave ou reiterado das obrigas inherentes á condición de asociado. O acordo de expulsión notificarase por escrito e contra el caberá recurso ante a primeira asemblea xeral que se realice.
- c) Por extinción da persoa xurídica.

Artigo 9. Dereitos dos asociados

Os asociados teñen os seguintes dereitos:

- a) Elixir e ser elixidos para formar parte da xunta directiva e doutros órganos que se poidan crear.
- b) Participar con voz e con voto na asemblea xeral.
- c) Obter información sobre calquera aspecto da marcha da asociación que lle poda resultar de interese.
- d) Os demais que resulten das normas legais e dos estatutos da asociación, ou dos acordos validamente adoptados polos seus órganos sociais.
- e) Participar nas actividades da asociación.

Para poder participar na asemblea xeral e nas actividades da asociación será necesario estar ao corrente no pagamento das cotas, no caso de que se aprobara o establecemento destas.

Artigo 10. Obrigas dos asociados

Son obrigas dos asociados:

- a) Satisfacer o pagamento de cotas, no caso de que se estableceran.
- b) Asistir ás asembleas xerais e acatar os estatutos e os acordos validamente adoptados polos órganos sociais.
- c) Ocupar os cargos para os que resulten elixidos e desempeñar fielmente as obrigas inherentes a ditos cargos.

- d) Participar e realizar cantas tarefas lles sexan encomendadas pola asemblea xeral, a xunta directiva, as mesas sectoriais das que formen parte ou outros órganos que se creen.
- e) Ausentarse nos debates e votacións sobre asuntos nos que teñan interese directo por motivos de titularidade, económicos ou societarios, de parentesco até o terceiro grao de consanguinidade, afinidade ou adopción, ou de amizade íntima ou inimidade manifesta.
- f) Fomentar os obxectivos que promove a asociación.
- g) Cumprir os demais deberes que resulten dos preceptos legais e estatutarios ou dos acordos validamente adoptados polos seus órganos sociais.

TÍTULO V. ÓRGANOS DA ASOCIACIÓN

Artigo 11. Órganos da asociación

Os órganos colexiados da asociación son, como mínimo, a asemblea xeral e a xunta directiva.

Os órganos unipersoais son, como mínimo, o presidente, o vicepresidente, o secretario e o tesoureiro. Os titulares destes órganos son elixidos pola xunta directiva de entre os seus membros, por un período de dous anos e poden ser reelixidos ata un máximo de oito anos consecutivos.

Artigo 12. Asemblea xeral: composición e funcións

1.- A asemblea xeral é o órgano supremo de goberno da asociación e estará integrada por todos os asociados.

2.- A asemblea xeral é o órgano competente sobre os seguintes asuntos:

- a) Aprobación das contas do exercicio anterior e do orzamento do exercicio seguinte.
- b) Aprobación da memoria de actividades e das actividades a realizar.
- c) Solicitude de declaración de utilidade pública.
- d) Establecemento do número, composición e representatividade dos órganos da asociación que se creen.
- e) Nomeamento dos membros da xunta directiva e cesamento anticipado deles.
- f) Coñecemento sobre cantas cuestións afecten á boa marcha da entidade que sexan sometidas á súa consideración pola xunta directiva ou polos asociados como rogo ou pregunta.
- g) Constitución de federacións ou integración nelas.
- h) Acordar a contía das cotas de ingreso e periódicas e a súa forma de pagamento. A asemblea poderá acordar establecer importes diferentes para asociados públicos e privados. A contía da cota de ingreso, no caso de que se establecera, será igual á achega fundacional, podendo a asemblea establecer unha actualización anual non superior ao IPC
- i) Aprobación do regulamento de réxime interior.
- j) Aprobación e modificación dos estatutos sociais.
- k) Disolución da asociación.
- l) Disposición ou alleamento de bens.

Artigo 13. Asemblea xeral: convocatorias

1.- A asemblea xeral reunirse con carácter ordinario cando menos unha vez ao ano para aprobar, como mínimo, as contas e os orzamentos. A convocatoria realizaraa o presidente con quince días de antelación, polo menos, á data da reunión, achegando a orde do día coa convocatoria.

2.- A asemblea xeral reunirse con carácter extraordinario tras a convocatoria da xunta directiva, acordada por propia iniciativa desta ou cando o solicite un número de asociados non inferior ao 10%. A petición dos asociados realizarase mediante escrito dirixido ao presidente, autorizado coa sinatura dos peticionarios, no que se expoña o motivo da convocatoria e a orde do día. Cando non se convoque transcorridos dez días dende o da petición, os peticionarios poderán facer a convocatoria. A asemblea xeral así convocada poderá desenvolverse elixindo ao inicio dela un presidente e un secretario.

3.- As asembleas xerais, tanto ordinarias coma extraordinarias, quedarán validamente constituídas en primeira convocatoria cando a elas concorran, presentes ou representados, a maioría dos asociados e, en segunda convocatoria, pasada media hora dende a fixada para a reunión en primeira convocatoria, calquera que sexa o número de asociados concorrentes. En todos os casos deberá cumprirse que os votos do sector privado representen máis do 50% dos votos totais.

4.- De cada unha das reunións realizadas levantarase a correspondente acta, que certificará o secretario co visto e prace do presidente.

Artigo 14. Asemblea xeral: adopción de acordos

1.- Cada asociado terá dereito a un voto.

2.- Os acordos sobre os asuntos sinalados nas letras a) a h) do apartado 2 do artigo 12 aprobaranse por maioría simple dos asociados presentes ou representados.

Non obstante, requirírase maioría dos dous terzos dos asociados presentes ou representados para decidir sobre os asuntos sinalados nas letras i) a l) do apartado 2 do artigo 12.

3.- Os acordos adoptados obrigarán a todos os asociados, incluso aos non asistentes. Os acordos acreditaranse mediante certificacións expedidas polo secretario co visto e prace do presidente.

Artigo 15. Xunta directiva: composición

1.- A xunta directiva da asociación estará formada polos representantes dos asociados elixidos pola asemblea xeral, en función da pertenza destes a cada mesa sectorial, de acordo coa representatividade que a asemblea xeral lle outorgue a cada unha delas. Constará dun máximo de trinta e cinco (35) membros. En todo caso, na xunta directiva deberán estar representadas, cando menos, as asociacións de mulleres, as asociacións de mozos, as organizacións profesionais agrarias e as cooperativas agrarias que formen parte da asociación. O número de representantes do sector privado sempre debe ser superior ao número de representantes do sector público.

2.- A metade dos membros renovarase cando transcorra un ano dende a constitución da asociación e a partir de aí cada ano renovarase a metade dos que leven dous anos elixidos, agás nos casos nos que non haiba nun sector máis entidades socias das que xa sexan membros da xunta directiva.

3.- Os membros da xunta directiva cesarán nos seus cargos por falecemento, por renuncia voluntaria, por transcurso do prazo do mandato, pola extinción da entidade á que representen, por perder a condición de representante da entidade á que representen ou por acordo da asemblea xeral. O cesamento levará consigo a obriga de poñer ao día ao sucesor e, eventualmente, de entregarlle a documentación pertinente.

4.- As vacantes que se produzan na xunta directiva cubriranse cos representantes dos asociados que elixa a asemblea xeral segundo a mesa sectorial e o sector público ou privado ao que pertenza a vacante.

Artigo 16. Xunta Directiva: funcións

1.- A xunta directiva é o órgano con facultades xestoras, executivas e de representación da asociación.

2.- A xunta directiva é o órgano competente para:

- a) Executar os acordos da asemblea xeral.
- b) Acordar e executar as accións de goberno e administración da asociación.
- c) Propoñer ou conceder axudas no marco de programas ou proxectos que xestione a asociación.
- d) Adoptar as medidas precisas para o cumprimento dos fins estatutarios e, en xeral, para a boa marcha da asociación.
- e) Elaborar o informe económico anual, o orzamento, a memoria e o plano de actividades para a súa presentación na asemblea xeral.
- f) Interpretar os preceptos contidos nos estatutos e no regulamento de réxime interno, de habelo.
- g) Organizar e coordinar as actividades e distribuír os traballos e responsabilidades entre os asociados.
- h) Elaborar o regulamento de réxime interior.
- i) A admisión e separación de asociados.
- j) Cantas deriven da lexislación ou estatutos e, en xeral, cantas facultades non estean reservadas por aquela ou por estes a outros órganos sociais, así como as delegadas pola asemblea xeral.

Artigo 17. Xunta directiva: convocatoria e adopción de acordos

1.- A xunta directiva reunirse en calquera momento mediante convocatoria do presidente, por propia iniciativa ou a instancia motivada de calquera dos seus membros, que indicarán os asuntos a tratar na orde do día.

2.- Entenderase validamente constituída en primeira convocatoria cando a ela concorran a maioría dos membros ou, en segunda convocatoria, pasada media hora dende a fixada para a reunión en primeira convocatoria, calquera que sexa o número de membros concorrentes. En todos os casos os membros do sector privado deberán representar máis do 50% dos votos totais. Poderán asistir ás sesións da xunta directiva, con voz pero sen voto, persoas ou entidades alleas á xunta directiva cuxo asesoramento sexa de interese para a adopción de acordos.

3.- Os membros da xunta directiva, en caso de ausencia, poderán delegar, por escrito, noutros membros do sector público ou privado, segundo o sector ao que pertenza o ausente.

4.- No proceso de toma de decisións, cada membro da xunta directiva ostenta un voto.

5.- Os acordos adoptaranse por maioría simple.

Artigo 18. Presidente

1.- A xunta directiva elixirá de entre os seus membros o presidente.

2.- O presidente ostenta a representación legal da asociación, tanto en xuízo coma fóra del, e ten voto de calidade en caso de empate nas votacións. Terá como funcións:

- a) Dirixir, ordenar e arbitrar os debates da asemblea xeral, da xunta directiva, así como convocar as súas reunións, presidilas e fixar a orde do día.
- b) Ordenar os gastos e pagamentos da entidade, asinando xunto co tesoureiro.
- c) Autorizar coa súa sinatura os escritos e comunicacións necesarios para o funcionamento da asociación, así como visar os documentos autorizados polo secretario, especialmente se teñen o carácter de certificacións.
- d) Asumir e realizar tantas encomendas como lle sexan encargadas por acordo da xunta directiva ou da asemblea xeral.
- e) Visar as actas das reunións e vixiar a execución dos acordos adoptados.
- f) Todas aquelas funcións que lle sexan atribuídas no regulamento de réxime interno.
- g) Subscribir contratos a nome da asociación, outorgar poderes a terceiros, interpoñer reclamacións en vía administrativa e ante a xurisdición ordinaria e as especiais, aceptar donativos, legados e herdanzas a beneficio de inventario, exercitar accións e opoñer excepcións.
- h) Coordinar todas as actividades que constitúen o obxecto da asociación.
- i) Exercer a xefatura do cadro de persoal da entidade.

Artigo 19. Vicepresidente

1.- A xunta directiva elixirá de entre os seus membros o vicepresidente.

2.- O vicepresidente, en ausencia do presidente, exercerá todas as funcións e atribucións encomendadas a este.

Artigo 20. Secretario

1.- A xunta directiva elixirá de entre os seus membros o secretario.

2.- Ao secretario correspóndenlle as seguintes funcións:

- a) Actuar exercendo como tal en todas as reunións.
- b) Custodiar os libros de actas e documentación da asociación, excepto os libros de contabilidade.
- c) Dirixir, organizar e coordinar o desenvolvemento das actividades administrativas da entidade.
- d) Redactar e anotar nos libros correspondentes as actas das reunións da asemblea xeral, da xunta directiva e da comisión permanente, se existe, así como expedir certificacións dos mesmos co visto e praxe do presidente.
- e) Levar a correspondencia ordinaria, o rexistro e o ficheiro, así como custodiar os selos.
- f) Executar os acordos estatutariamente adoptados, baixo a supervisión do presidente,
- g) Redactar a memoria anual da asociación.
- h) Todas aquelas que lle sexan atribuídas no regulamento de réxime interno.

Artigo 21. Tesoureiro

1.- A xunta directiva elixirá de entre os seus membros o tesoureiro.

2.- Ao tesoureiro correspóndenlle as seguintes funcións:

- a) Recadar os fondos para a asociación e custodialos.
- b) Efectuar os pagamentos acordados polo presidente.
- c) Dirixir e ordenar a contabilidade, así como velar pola orde económica da asociación.
- d) Elaborar o orzamento anual de ingresos e gastos, así como os balances.
- e) Levar os libros de contabilidade e o inventario de bens.
- f) Todas aquelas que lle sexan atribuídas no regulamento de réxime interno.

Artigo 22. Mesas sectoriais

1.- Os asociados integrados na asemblea xeral organizaranse en seis (6) mesas sectoriais, organizadas en torno aos seguintes ámbitos:

- a) Mesa institucional: formada polos representantes das Administracións Locais do territorio.
- b) Mesa de dinamización sociocomunitaria: na que se agrupan as asociacións sen ánimo de lucro non incluídas noutras mesas sectoriais: *asociacións de mulleres, de mozos, de veciños, medioambientais, culturais, deportivas, entre outras.*
- c) Mesa do sector agroforestal: inclúe entidades representativas do sector, como *cooperativas agrarias, sociedades agrarias de transformación, comunidades de montes, asociacións forestais, organizacións profesionais agrarias.*

- d) Mesa empresarial e do emprego: formada por entidades empresariais, sindicais, Cámara de Comercio.
- e) Mesa de benestar social: integrada polas entidades do ámbito dos servizos sociais que teñan como obxecto social mellorar a calidade de vida da poboación, especialmente de colectivos con especiais dificultades e colectivos desfavorecidos ou en perigo de exclusión social.
- f) Mesa de turismo e hostalería: formada polas entidades vencelladas ao fomento do turismo e á representación de empresas turísticas e de hostelería.

2.- As mesas sectoriais teñen como finalidade servir tanto de canle participativa na asociación dos actores implicados no desenvolvemento do territorio como de canle informativa das actividades da asociación. Nas mesas sectoriais porase en común a problemática do sector ao que representen e as actuacións de mellora, proxectos, iniciativas... que o sector poida concebir, para elevar propostas á asemblea xeral.

3.- A asemblea xeral poderá variar as mesas sectoriais segundo as novas demandas ou sectores que xurdan no territorio e decidirá o número de representantes que lle corresponderá a cada mesa sectorial na xunta directiva. Os representantes das mesas na xunta directiva serán elixidos pola asemblea xeral por proposta de cada mesa.

TÍTULO VI. RÉXIME ECONÓMICO E PATRIMONIAL

Artigo 23. Réxime económico e patrimonial

1.- No momento da súa constitución, a asociación carece de patrimonio fundacional.

2.- O patrimonio estará constituído polos ingresos provenientes de:

- a) Achegas económicas dos asociados.
- b) Doazóns, subvencións, legados e herdanzas.
- c) Resultados económicos que se podan producir polas actividades organizadas pola entidade.
- d) Outros ingresos permitidos pola lexislación vixente.

O exercicio económico pecharase o 31 de decembro de cada ano.

TÍTULO VII. DISOLUCIÓN DA ASOCIACIÓN

Artigo 24. Disolución

1.- A asociación establécese por tempo indefinido e poderá disolverse, no seu caso,

- a) por sentenza xudicial,
- b) por acordo tomado en asemblea xeral convocada ao efecto,
- c) por carecer de recursos económicos para cubrir os gastos máis elementais,
- d) por ter realizado o fin para o que se constituíu
- e) polas demais causas que determina a lei.

Unha vez disolta a asociación procederáse á súa liquidación.

2.- Se non se acordase outra cousa na asemblea xeral, actuarán como liquidadores tres dos membros da xunta directiva, nomeados por esta para esa función.

3.- A comisión liquidadora farase cargo do patrimonio existente e satisfará as obrigas pendentes, se as houbera. O remanente, no caso de que exista, será entregado a calquera entidade legalmente constituída que se dedique a idénticos fins ou, no seu defecto, análogos aos desta asociación.”

Aberto o turno de intervencións (.../....)

Rematadas as intervencións e sometido pola Presidencia a votación ordinaria o asunto, a comisión Informativa de Facenda e Promoción Económica, con 5 (cinco) votos a favor (dos/as Sres/as Polo Gundin, López Rodríguez, Rodríguez Carballeira, Roca Requeijo e Sánchez Martínez), ningún voto en contra, e dúas (2) abstencións (dos/as Sres/as Franco Casal e Bértoa Puente), acorda ditaminar favorablemente a proposición da Alcaldía de data 17 de xuño de 2008 que devén en ditame nos termos anteriormente transcritos. “”

Aberto o debate pide o uso da palabra o Sr. Polo Gundín quen, unha vez concedido, manifesta que se reitera no comentado na Comisión e que este grupo de acción local, agora chamado grupo de desenvolvemento rural, unha das poucas variacións que hai verbo do anterior é que pasa a substituír ao Grupo de acción local Costa Ártabra e que unha das modificacións que sufríu foi a incorporación do antigo grupo de acción local de Ortegal

formado por catro Concellos de Ortegal, polo que pasouse a chamar Costa Noroeste e que inclúense os Concellos da actual Costa Ártabra e da Costa de Ortegal; que é un programa onde hai catro millóns de euros para xestionar; que teñen fundamentalmente unha orientación de fondos europeos e para o desenvolvemento rural e que as liñas de actuación veñen bastante ben definidas por parte de Agader e da Unión Europea, que básicamente son o desenvolvemento tanto de accións no sector primario do medio rural como de diversificación, desenvolvemento turístico e accións de mellora do entorno do medio rural, telecomunicacións etc.; que agardan que o Concello de Fene neste programa sexa capaz desde o primeiro momento de meter algún proxecto que sexa de interese para o Concello, ao igual que se fixo no anterior programa que foi o sendeiro circular, e facer actuacións que cubran obxectivos do novo programa. Remata a súa intervención dicindo que é un modelo de xestión bastante positivo, onde se busca a participación tanto do sector público como do privado a nivel asociativo e a nivel empresarial e que esperan que sexa de rendemento para o Concello.

A continuación pide o uso da palabra o Sr. Galego Feal quen, unha vez concedido, manifesta que van votar a favor desta proposta porque estiman que o Concello si debe estar representado en tódolos ámbitos onde se poida decidir algo, ou ben se poida traer algunha iniciativa para o Concello, pero que si van manifestar as súas reservas no tocante ao tema dos Estatutos porque cren que se utilizan conceptos xurídicos indeterminados e ademais non se fixa con certa obxectividade quen van ser os membros, a composición desas asociacións e que cando se fala no artigo 15 da xunta directiva, da súa composición, cren que non se concreta moito polo que isto pode acabar medio nunha reunión de amigos, e non é propiamente iso, polo que cren que si deberían de estar moito máis definidas as características das asociacións que deben formar parte deste tipo de iniciativas que quedan un pouco difundidas no aire. Continúa dicindo que a raíz de todo iso, tamén lles preocupa bastante que sexa a Xunta directiva precisamente a que opte pola admisión ou separación dos asociados, xa que cre que o lóxico debería ser que fose sempre a proposta dunha asemblea xeral, polo que cren que certo poder que poidan ter estes vai quedar un pouco no aire e á expectativa de quen poida integrarse ou non nesta asociación, o que non lle parecen datos obxectivos e pregunta quen vai ser o xuíz disto.

(Incorpórase á sesión o Concelleiro D. Antón Lois Noceda Carballo).

Continúa a súa intervención o Sr. Galego Feal e di que para él isto non lle parece obxectivo, senón que se vai dar á subxectividade, a que cada un aprecie estas circunstancias polo que manifestan estas reservas. Di que tamén manifesta as súas reservas a que pasen a formar parte de forma inescusable as cooperativas, sociedades agrarias de transformación e sociedades laborais, xa que todos saben que hai cooperativas e sociedades laborais que son tan voráxines como calquera empresa do sector privado puro e duro.

Intervén de seguido o Sr. Alcalde-Presidente e manifesta que van votar a favor desta adhesión e desta iniciativa xa que existe unha experiencia previa que xustifica o bó traballo, con réditos positivos para Fene que ten sumarse a un grupo deste tipo. Di que cre que Costa Ártabra foi do mellor probablemente que se fixo nos últimos anos en Ferrolterra, foi un modelo que veu de colaboración entre os diferentes Concellos, deixando a un lado posturas partidistas e posturas políticas, algo que realmente non é moi doado e nesta comarca especialmente, polo que, dado que o que se produce na práctica é un cambio de nome do grupo de acción local e a suma dunha serie de Concellos que antes non estaban en Costa Ártabra pero que se mantén o mesmo equipo, a mesma estrutura e o mesmo xeito de funcionar, parécelles tremendamente positivo continuar unha serie de anos máis recibindo estes fondos da Unión Europea e sobre todo, xestionándoos e planificándoos comarcamente e con repercusión local no ámbito de Fene para seguir traballando como ata agora.

Seguidamente pide o uso da palabra o Sr. Polo Gundín quen, unha vez concedido, manifesta que lle gusta que o Sr. Galego Feal teña preocupación pola representatividade desta nova asociación; di que cre que o que se garante aquí é que tódolos elementos que teñen capacidade de actuación sobre o territorio teñan un espazo, unha forma de entrar dentro da asociación, cunha base territorial, que son os Concellos e que é xusto o contrario que fixera no seu día o Partido Popular, que promoveu activamente, como no caso de Ortigueira e moitos outros máis, fundacións que escapaban absolutamente desa participación, é dicir, que eran uns xestores privados totalmente diferentes; que aquí se busca a participación da realidade do territorio, posto que é unha cuestión voluntaria, como estase a facer neste pleno, de integrarse ou non; que a base municipal a asociación a ten, e agora o que hai que conseguir é que ademais exista unha base social, de axentes que actúen sobre o territorio, e que cre que é un método moito máis participativo e aberto e transparente para xestiona-los fondos.

A continuación pide o uso da palabra o Sr. Galego Feal quen, unha vez concedido, manifesta que non é iso o que máis lle preocupa senón que por esa vía, poidan pasar a formar parte novas asociacións que non reúnan as características.

Rematado o debate, polo Sr. Alcalde-Presidente sométese a votación ordinaria o ditame da Comisión Informativa de Facenda e Promoción Económica de data 19 de xuño de 2008 sendo aprobado por unanimidade.

Á vista do resultado da votación, declárase aprobado o ditame da Comisión Informativa de Facenda e Promoción Económica de data 19 de xuño de 2008 que devén en acordo nos termos anteriormente transcritos.

E non habendo máis asuntos que tratar, pola Presidencia levántase a sesión ás nove horas e vinte minutos do día ao comezo sinalado, estendéndose de todo elo a presente acta, do que eu, secretaria xeral, dou fe.

Vº e praxe,
O Alcalde-presidente

A secretaria xeral,

Asdo. José Iván Puentes Rivera.

Asdo.: Pilar María Pastor Novo.